

ATXILOTUTAKO 21 LAGUNEN ARTEAN, 'CAPO' GALIZIAR BAT ETA C ALIKO KOLONBIARRAK DAUDE

Galiziara 1.500 tona kokaina zeramatzan untzi bat atzeman dute

Kolonbiako *Caliko cartel*-ak ustez Galiziako droga trafikatzaleei saldutako droga atzeman dute segurtasun indarrek Atlantiko Ozeanoan zegoen untzi batean. Trafikatzaileen ondasunak azaleratzeko bidea zabalik dagoela dio Barne Ministerioa.



Iazko urtarrilean Coruñan Mae Yemanja untzian aurkitutako kokaina. RAQUEL EFE

Efe / Madril

HERENEGUN gauean Kanarietan, Madrilen eta Galizian egindako *Manzanal* operazioaren garrantzia azpimarratu nahian, Jaime Mayor Oreja Espainiako Barne ministroak parte hartu zuen atxiloketen berri emateko prentsaurrekoan. Ministroak azpimarratu zuenez, operazio honi esker errazagoa izango da droga trafikatzaleek irabaziak ezkutatzeko erabiltzen dituzten bideak argitzea. Operazioa koordinatu duen Baltasar Garzon epaileak bankuetako hainbat diru kontu aztertzeke eta zenbait enpresa miazteke agindu du.

Jose Garcia Losadak, Poliziako droga trafikoaren aurkako taldeko buruak, prentsaurrekoan azaldu zuenez, kokainaz kargatutako *Martinez Alvarez* arrantzuntzia ostegun arratsaldean aurkitu zuten Kanariar Uhartetatik bi egunera, Atlantiko Ozeanoan. Gaueko 22:30etan, Aduana Zaindaritzaren (SVA) untzi batek arrantzuntzia atzeman zuen, zazpi marinelak atxilotu eta sotoetan 1.500 kilo kokaina aurkitu zituen ezkutatuta. Osteguneko gau horretan bertan, Poliziak hamabi lagun atxilotu zituen Madril (lau kolonbiar eta zortzi espainiar) eta beste bi Galizian.

Kolonbiako droga Galiziara • Ikerketak duela urtebete hasi zituzten Madrilgo San Blas eta Cosladako komisarietakoek. Horien bidez jakin ahal izan zen *Caliko cartel*-ak Kolonbiatik kokaina eramaten zuela Galiziara, bertako droga trafikatzaleek bana zezaten. Getafen (Madrilen) atxilotutako artean dago sare horretako ustezko burua, Galiziako trafikatzaleen *capo* eza-guna omen dena. Berri hau idaztean artean ez zuten zabaldu horren izenik, baina espetxean egondakoa dela esan zuten.

Gonzalo Robles Drogaren aurkako Planeko buruak azaldu zuenez, *Caliko cartel*-eko kide

asko Espainian daudela ohartu dira. Bere iritziz, bi arrazoi daude horretarako: Poliziak Galiziako sareak ahuldu dituela eta kolonbiarrek nahiago dutela operazioak zuzenean kontrolatu.

Ostegunean aurkitutako 1.500 kilo kokaina horiek aurtengo bigarren harrapaketa handiena dira, urtarrilean *Estrella de David* untzian aurkitutako ondoren. Azken bi urteetan antzeko beste hiru atzemate izan dira: 2.580 kilo kokaina *Mae Yemanja* arrantzuntzian 1996ko urtarrilean, 2.500 kilo 1995eko urtarrilean Atlantiko erdian zegoen untzi batean eta 1.870 kilo kokaina beste itsasontzi batean. X

Herritarrentzat ez da isunik katalanaren lege berrian

Kataluniako instituzioen hizkuntza bertakoa da, baina gaztelaren erabilera bermatuko da

Erredakzioa / Donostia

JOAN MARIA PUJALS-EK, Generalitateko Kultura sailburuak, Kataluniako Legebiltzarreko talde politikoei aurkeztu zien atzo katalanaren lege berria. Lege horretan ez da batzuek espero zuten isunik aurreikusiko herritarrentzat, baina administrazioek eta funtzionarioek bete beharreko zenbait arau azalduko dira.

Pujalsen arabera, Hizkuntza Ofizialen Erabilerari Buruzko Legeak «orientagarria izan behar du herritarrentzat eta agindu administrazioarentzat eta funtzionarioentzat». Hau da, herritarrek

katalana zein gaztelera erabili ahal izango dute instituzioekin dituzten harreman guztietan, eta eskubide hori bermatzen ez duten administrazioaren atalak zigortu ahal izango dira. Katalanaren lege berriak ez du isunik bilduko, eta beste arau batzuek aurreikusten dituzten zigorrak jasoko ditu. Adibidez, arlo sozioekonomikoan 1993ko konsumitzaileen legeko zigorrak ezarriko zaizkie gizabanakoen hizkuntza eskubideak betetzen ez dituztenei eta funtzio publikoaren legekoak funtzionarioei.

Pujalsek ezinbestekotzat jo zuen 1983ko legea berrituko

duen beste arau bat, bere iritziz orain «bi hizkuntza ofizialen erabilera instituzionala arautu behar delako, eta ez soilik katalanarena, orain arte bezala». Lege berriak esango duenez, katalana izango da bertako instituzioen hizkuntza, baina herritarrek, instituzioekin dituzten harremanetan, hizkuntz hori edo gaztelera erabiltzeko eskubidea bermaturik izango dute.

Generalitatearen asmoa da lege berriak katalanaren erabilera hedatzea oraindik zabaldu gabe dagoen esparruetan —justizia eta zenbait arlo ekonomiko— eta komunikabideetan. Bankuei,

aurrezki kutxei eta aseguru etxeei eskatuko zaie agiri guztiak katalanez zein gaztelerez idaztea. Herriko edo kable bidezko telebistei proposatuko zaie emisioaren zati bat derrigorrez katalanez egitea, eta berdin egingo da Generalitatearen baimena duten irrati kateekin. Produktuak edo zerbitzuak eskaintzen dituzten enpresek, berri, bi hizkuntza ofizialean erantzun beharko diete herritarrei.

Legearen testua alderdi politiko guztiek osatuko duten batzordean egingo dute. Pujalsek atzo aurkeztutako testua izango da eztabaiden abiapuntua. X

Canalsatelitek Gobernua salatu du Bruselan

Kirol emankizunei buruzko araua hurrengo ministroen kontseiluan onartuko da

Efe / Madril-Brusela

PRISA taldearen eta Antena 3 telebista pribatuaren artean osatu duten Canalsatelite Digitalen salaketa aurkeztu zuen atzo Espainiako Gobernuaren aurka Europako Batzordean. Canalsateliteren arabera, PPko gobernua Europako Batzordearen araudia hautsi zuen joan den asteko bileran telebista digitalari buruzko lege-dekretua egitean. Hain zuzen ere, Canalsatelitek uste du Europako legediaren aurka doala telebistaren irudia dekodeatzeko aparailu bakarra izatera derrigortzea. Ordaindu beharreko telebistaren BEZ zerga % 7tik % 16ra igotzea ere salatzeke modukotzat jotzen du Canalsatelitek.

PRISA taldearen eta Gobernuaren artean sortu den gerra digitala datorren astean bizitu egingo da seguru aski, Gobernuak ostiralean onartuko baitu kirol emankizunei buruzko araudia. Miguel Angel Rodriguez Gobernuako bozeramaileak atzo azaldu zuenez, Gobernuak erabakiko du zein emanaldi den gizartearen interesekoa eta, hortaz, ez den ordaindu beharreko telebistan eskaini behar. X

Garraio publikoetako grebak hiri askotan jarraitu zuen atzo

Allande Sokarros / Baiona

HIRI garraio publikoetako grebak bigarren eguna izan zuen atzo Frantziako hainbat lekutan, hala nola Marseilla, Lille, Tolosa, Bordele, Estraburgo, Clermont-Ferrand, Dijon, Le Mans eta Amiens. Marseillan, esate baterako, ia autobus guztiak geldian geratu ziren. Beste hiri batzuetan, aldiz, autobusak eta beste garraio bideak normalki zebiltzan, esaterako, Lyon, Saint-Etienne, Macon eta Mulhousen. Herenegunetik lana utzia duten gidariak erretiroa 55 urtetan hartzeko aukera eta astean 35 orduko lanaldia eskatzen dute.

Gatazka gogorrenetatik bat Tolosan (Okzitania) da, hiri horretako kaleetan 14 egun hauetan ez baita autobusik ibiltzen. Egoera horrek sortzen dituen ondorioen salatzeke, dozenaka dendari elkarretaratu ziren atzo goizean prefeturaren aitzinean, eta administrazioako agintariei ordezko garraio publikoak abian jar daitezen exijitu zieten. Azken inkesta baten arabera, hiritarretatik % 52k gaitziritzia dio grebari. X